

郭襄靖公遺集

郭襄靖公遺集卷之五

莆中 郭應聘君賓著

年友漳浦朱天球君玉編

門人泰和郭子章相奎訂

門人晉江王任重尹卿校

不肖男良翰梓

奏疏 再撫廣西

再撫廣西到任謝 恩疏

奏爲恭謝

天恩事臣前任兵部右侍郎兼都察院右僉都御史
巡撫廣西萬曆三年九月初六日陞戶部右侍郎
萬曆四年二月二十六日丁憂回籍於萬曆八年
十月十九日准吏部咨開九月初三日該本部等
衙門會推題奉

聖旨郭應聘着改兵部右侍郎兼都察院右僉都御
史巡撫廣西地方寫勅與他欽此欽遵備咨到臣
臣於本年十一月初一日原籍起程十二月十八
日馳至廣西境上接管巡撫事務隨據布按都三

司呈送

欽降關防一顆

符驗一道

令旗牌八面副到臣收掌謹望

闕叩頭謝 恩恭候

勅諭至日祇領欽遵外竊念臣本以疎庸謬叨任使
昔在西粵曾靡效乎涓埃頃歸故園已息心於榮
進忽承

綸召復撫舊疆豈謂老馬驅馳智猶堪以索路自分

蚊蠓微眇力實難於負山矧八寨之氛侵甬平方
資善後三江之夷獠叵測尤切杜萌顧臣何人敢
當斯寄伏念

天恩高厚

簡命崇嚴爰力疾以登程旣入境而受事覩閭閻之
凋耗何以馴致於內寧憫夷落之冥頑何以免塵
乎西顧悚惶無任感奮彌深敢不誓殫赤衷思永
收乎來效堅持晚節求無墜於前功庶盡職分之
尋常少答

鴻慈於萬一臣不勝感激隕越之至

考察自陳疏

奏爲自陳不職乞

賜罷斥以昭察典事照得萬曆九年屬當考察在京
官員臣係三品京堂官例該自陳臣年五十九歲
原籍福建興化府莆田縣人由嘉靖二十九年進
士除授戶部山西清吏司主事歷陞本司員外郎
廣東清吏司郎中廣西南寧府知府四川按察司
威茂兵備副使廣東布政司左叅政廣西按察司

按察使本省布政司左右布政使隆慶五年八月二十八日推陞都察院右副都御史巡撫廣西地方萬曆二年閏十二月內陞兵部右侍郎兼都察院右僉都御史仍舊巡撫三年九月初六日陞戶部右侍郎四年二月二十六日丁憂回籍八年九月初五日復起兵部右侍郎兼都察院右僉都御史巡撫廣西伏念臣猥以微流謬塵宦籍歷官三十餘載蹤跡半在粵西頃復起臣于家仍撫茲土自念受

渥恩於

三朝亦欲效鉛刀之一割顧念臣知識短淺才力孱庸徒兢惕以自持無尺寸之可紀朝夕黽勉或可自盡於尋常節鉞撫綏豈容濫叨乎重寄加以資稟素弱疾病侵尋理軍書或至遺忘綜吏治深慙表率方今

聖明在上俊乂盈

朝正當度德而論才奚敢受直而怠事若舉黜罰之典臣寔當爲衆先伏乞

聖恩俯賜罷斥別選才望以充斯任庶微臣得素餐之罪而地方亦無債事之虞臣無任戰慄待罪之至

議留官鹽疏

題爲查復舊規通商便民事據廣西布政司呈奉總督撫按三院案驗仰司會同按都二司并鹽法糧儲道將廣東韶連二路復引納餉及廣西官運與民商竝聽常行及量寬禁例等項逐一詳加酌議停妥具由通詳奉此又奉總督兩廣軍門劉堯

誨批據廣東按察司鹽法兼管屯田道僉事張友
舜呈詳會同布政司掌印右布政使湯仰議稱廣
東乃產鹽之區湖廣廣西乃行鹽之地往昔廣西
商民販運至梧州納堂由府江至全州以達湖廣
衡永地方發賣自東廣至韶州納堂進橋西河抵
樂昌發賣由清遠比號至連州星子發賣其樂昌
羅家渡及星子白牛橋與湖廣郴桂臨藍地雖接
壤皆係窮源峻嶺原無舟楫可通比近之民皆肩
挑背負貨買食用而韶州與連州緣此歲額銷鹽

多者各萬餘引少者不下八九千引自嘉靖年以前向未有禁此舊規流通軍餉民食各得其便者也繼隆慶五年西省恢復古田縣治爲善後兵食乃以東省之鹽運至西省權稅定以周年三運每運三萬五千包韶連二路歲止許拆三千六百引視前頓減三分之二而西省增餉二萬有奇損此益彼似若可行但西省運鹽道經梧州方達府江灘高水急逆流牽挽難以日計此道路之不便也又西省初議打造官船裝運後因官船易壞復雇

民船裝載每十船爲一幫一船偶有不測則扣除
九船腳價倍償故船戶多苦虛累此運船之不便
也且委官自東省運至西省堆積鹽阜轉賣與民
商販往湖廣衡永等府發賣去途旣遠取利又微
商人每每躲避此販賣之不便也是以數年以來
周歲僅得一運非法之不行乃勢之必然也當時
僉議謂損東省之餉以資西省之食夫何韶連之
商販旣禁而西省之軍餉竟亦不充無非道遠運
難其鹽積滯而不通以致衡永無鹽食淡此新議

之難行不能經久而不變也即便盡將韶連二路
引鹽盡行禁絕以期西省一年三運亦不可得是
兩省之軍餉並損而鄰省之民食亦缺若徒拘新
議則將來課額愈縮益又不可挽矣揆之事勢不
若復舊制以增餉更新議以通商萬一東省之
餉稍盈西省之用不足則或從宜移此益彼亦未
爲不可合無以萬曆八年爲始每年韶州西河原
納萬引今減作七千引連州原納一萬餘引今減
作八千引照依初詳查復舊規俾令疏通聽其肩

挑背負買食不必禁止庶連界附近地方之民不
苦乏鹽而東廣鹽法不致阻滯舊額餉銀可免虧
少等因奉批到司隨該本司掌印右布政使吳善
會同按察司掌印按察使孫光祖都司掌印署都
指揮僉事白玉查議得廣西公無厚積民鮮蓋藏
鹽法未行之先夷寇猖獗戰守無資坐視其亂而
莫之戢自古田平後始議運官鹽取息以充軍餉
凡百經制區畫詳備節經題奉

欽依遵行數年獲利以十餘萬計民賦不加軍需用

足古田之歲餉則給十寨之大征則給一應善後
增兵之費亦率多取給焉此則鹽運之大利於西
粵信地方安危所係也原議每歲三運後則運數
漸縮或二年三運或一年一運蓋因府江灘險牽
挽稍遲或缺官更委展轉難速此則時勢之不得
不然而非法令之不嚴也茲者仰荷總督軍門建
議通變歲復韶連之引共一萬五千道廣西官商
二鹽照舊聽從運賣俾東西之鹽利竝興衡永之
食鹽稱便此大同無我之度固舉三省而兼利之

矣但東西二省有若持衡彼重則此輕固低昂之
定勢民生食鹽止有此數商既東趨必不西顧亦
消長之常理自舊歲六月以來府江商鹽納堂每
月不上三五船省城官鹽發賣每月不上二千包
此東引盛而西鹽阻已試之明驗較然矣官鹽阻
則取息必微鹽利微則軍餉漸乏將來西粵地方
未可謂無隱憂者合無仍將韶連鹽引每處各量
減二三千道庶可少分其商於西省而西省官鹽
一面設法催運收買必足斤數押運必革濫費在

途禁私販之姦在船禁夾帶之弊在嚴防侵盜之
虞在商清使用之擾庶幾湖商來集每年一運或
可銷發得盡儻或商終不至鹽終不通而軍餉終
匱乏則裒益權宜自有三院籌邊大計在也等因
到臣該臣看得廣西地方土瘠民貧各州縣額解
稅糧僅充宗祿及官俸之用其桂林柳慶梧州
等府一應營戍官兵歲仰給於廣東餉銀及湖廣
協濟糧銀從來久矣蓋夷情邊患唇齒相依之勢
固然也至隆慶五年征復古田屯兵設將所費不

貲旣不敢再干

天帑亦不敢復覲東餉以給西師該前任巡撫都御史殷正茂始創轉鹽之法以資善後兵食誠出不獲已之計也查自隆慶六年起至萬曆六年止或一年二運或二年三運或一年一運計十一運共獲鹽利一十二萬一千八十八兩有奇除古田善後兵食并大征十寨北三等項支用外實存在庫銀七萬四千五百五十五兩六錢二分七釐俱經巡按御史胡宥清查明白造冊具奏訖又十二

運報鹽五萬四千八十三包見發未盡十三運報
鹽四萬八千七百六十二包見運未回此在他省
視之誠不足重輕在廣西荒瘠之區其所濟亦不
少矣然立法之初韶連禁例甚嚴故衡永通行無
滯逮至于後韶連之商日告通引衡永之民日求
弛禁當事者始議二路每年共給引目三千六百
道以塞私販之途行之數年而告者紛紛未已督
臣乃復有增引之

請臣等揆之事勢若韶連二路引鹽只依近例三千

六百之數則商民告擾勢終難行若二路增引過多而廣西官運商船竝聽兼行又恐官鹽壅滯亦終之歸於廢閣部議謂商鹽一行官鹽必阻二三年後求一年一運亦不可得誠慮之深而籌之審矣臣等復何容言哉該臣會同總督兩廣侍郎劉堯誨巡按廣西監察御史李東議照官鹽之法在廣東司道議增韶連引鹽以裕東餉在廣西司道議減韶連引鹽以存西運無非各爲地方之計而自督臣視之則皆吾土吾民均屬一體者也查據

各司道開報古田各營堡官兵共一千六百四十
八員名每年該支餉銀一萬一千七百七十六兩
又近議十寨善後次年亦應支鹽利銀一萬二千
四百四十有奇若使官鹽不行則前項兵食何從
取給夷情叵測既不敢輕議撤兵而物力素疲又
別無措畫之法若復一一求足於東餉爲督臣者
處之亦甚難矣藉使取給一時安保其久而弗變
耶臣等再三籌度合無如督臣先後所議就中酌
處將韶連二路於原議三千六百引之外量增引

目而西省官鹽一面設法督催一年一運銷發得盡猶可少獲微息以餉諸兵而又梧鎮每年額發一萬六千七百四十三兩盡數解司湊給庶事體不至異同地方均有利賴伏乞

勅下戶部再加酌議上

請行臣等轉行各司道欽遵施行

議留任事將領疏

題爲議留任事將領以安兵後地方事臣近閱邸報四川松潘缺副總兵推廣西思恩叅將李應

祥陞補臣仰見我

皇上因材授任激勵將卒之盛心也臣竊惟粵西之有八寨與古田府江懷遠諸夷聲勢相倚其爲全省之患久矣頃歲仰仗

天威廟算興師致討八寨巢穴悉已蕩平復用督撫諸臣之議設鎮置堡列戍屯兵而又遷南丹衛官軍於三里城以思恩叅將專一駐劄其地經理諸務所以爲善後之謀者亦既詳且備矣但逋誅羣醜勢難盡殲旁近諸巢糾合甚易節經臣等督責

叅將李應祥等設法撫處隨據冊報撫過餘黨計
七百餘名安插住種其竄匿鄰境未就羈束者尚
多又該臣刊發榜示推誠撫插去後即今鎮堡之
屯列城署之脩建田土之處分俱有次第惟遠近
殘徒懷疑挾忿往往聲言糾衆報復城邑營堡之
防不容一日少懈古田之常狼要可鑒也若非得
任事將領以當防禦之寄犬羊叵測臣竊有隱憂
焉及查原題

報十寨功次疏內議將叅將李應祥加陞副總兵職

銜專責以善後事務今本官未終所事勢難輕離
地方臣等不容不曲爲議處者該臣會同總督兩
廣侍郎劉堯誨巡按廣西監察御史李東議照用
兵之道善後爲急得人爲難而諳習夷情擔當利
害者尤不易得今叅將李應祥謀勇兼優邊荒久
歷恩信允孚於士卒威令素懾於猺夷倡議討賊
多資先事之籌思患預防力任善後之計以故大
舉之時兵威獨奮功級最多近復先後計擒漏刃
首從賊徒羅兩黃公遨肅公炆樊汗陸公豹等貳

拾餘名諸夷爲之斂戢是彈壓八寨在今日誠不可無此官者若使代以他將則地利夷情未必練習兵防士氣未必振揚萬一殘孽乘機煽動甚非細故相應酌處伏乞

聖明軫念兵後地方將領重寄

勅下該部再加酌議如果臣等所言不謬將叅將李應祥改陞副總兵職銜仍管思恩叅將事務照舊督理善後撫安民夷遇有僮寇出沒相機剿捕俟二三年後地方永靖殘徒帖服准照副總兵事例

破格陞擢其松潘副總兵員缺或思恩叅將已推有官併乞另行推用庶彈壓得人而邊疆大有攸賴矣

奏報大征十寨錢糧疏

奏爲議殄積惡寨賊以裨全省地方長計事據廣西布政使司呈將大征十寨支用過一應糧餉數目造冊繳報到臣據此案查先准戶部咨前事該前任巡撫都御史張任等會題十寨用兵動支鹽利并 奏留印承吏農事例等銀緣由本部覆議

將庫貯歷年鹽利銀五萬七千二百六十七兩
梧鎮額發布政司戍兵餉銀二萬六千九百七十二
兩先行動支以充兵餉若果兵駐日久銀不敷用
准在印承吏農等銀一萬四百七十兩三錢四分
內酌量接支如軍餉銀兩足用仍將印承等銀解
部督撫官於賊平之日將前項留用銀兩開用過
細數 奏報等因題奉

欽依備咨前來已經通行欽遵去後今據呈繳到臣
查得內開 奏留鹽利年例事例等銀共計七萬

七千七百三十七兩三錢四分支發過各府州縣
哨弁本司徑支鹽利年例銀五萬一百四十五兩
零一分一釐四毫實支銷過銀四萬二千二百二
十八兩五錢伍分九釐九毫九絲六忽八微九纖
六塵九埃八沙尚支剩銀七千九百一十六兩四
錢五分一釐四毫三忽一微三塵二沙并布政司
見貯未支鹽利銀一萬七千一百二十一兩九錢
八分八釐六毫及 奏留印承事例銀一萬四百
七十兩三錢四分又各府州縣詳允支銷在庫

銀七千六百七十三兩二錢九釐四毫七絲七忽
一微三塵二沙雖非軍餉之數已經臨時湊充軍
餉支給合應併造計支銷過銀七千一百七十七
兩二錢九釐四毫七絲七忽一微三塵二沙支剩
銀四百九十六兩并變賣米價多出銀一十四兩
共銀五百一十兩以上通共支過軍餉并在庫官
銀四萬九千四百零五兩七錢六分九釐四毫七
絲四忽實存剩并未支鹽利印承事例及在庫官
銀共三萬六千一十八兩七錢八分三忽一微三

塵二沙又餉銀買米二萬七千一百八十六石一斗七升五合支銷過米一萬九千五百三十九石六斗七升五合剩米七千六百四十六石五斗各府州縣詳允支銷在倉糧米一萬六千石支銷過米九千五百六十三石四斗五合剩米六千四百三十六石五斗九升五合二項共支銷過米二萬九千一百零三石八斗實存剩米一萬四千八百三十石九升五合又大征事竣收回變賣過馬價銀二百兩賊屬牛馬價銀一千一百三十二兩三

錢一分賊贓銀碗二箇共重三兩變賣器仗銀一
錢贓銀一十九兩銅錢一千四百五十文善後賊
牛四十五隻黃布旗六十面帶六十條銅印一顆
器仗一千一百二十九件該臣再三覆覈明白行
令該司并各府州縣照數收貯支剩餉銀餉米專
備十寨善後支用不許別項那借賊屬牛馬價銀
賊贓等項聽候作正支銷外理合開坐造冊謹具

奏聞

減革均徭里甲兵款驛傳四差疏

題爲災報頻仍民隱可憂乞

勅當事臣工備查恤民事宜酌定經制以蘇困弊以
永治安事據廣西布政使司呈奉臣批據守巡桂
林左江右江各道呈詳查過各屬原額均徭里甲
兵款驛傳四差及各衙門一應公費公差等項應
存應減應革各數目緣由奉批仰布政司會議類
詳奉此又據梧州府查議各項存減銀兩開造冊
報到司該本司掌印左布政使孫光祖右布政使
吳善會同按察司掌印按察使唐汝廸查得各府

州縣原額夏秋稅糧悉遵舊規照常徵派不得驟
議增減外隨將道府造報冊內逐一會議參酌各
項欸目委柳州府推官劉正悉心查理類造草冊
送司復委桂林府同知梁直通判李佳徵帶同書
算赴司斟酌磨算內除桂林府屬永寧州緣係州
治初復柳州府屬懷遠縣地方殘破俱原未議有
審編均徭里甲及思恩軍民府一應歲費銀兩原
係於九土司官田城頭墟渡稅銀徵用不在均徭
里甲又太平府所屬十九州縣皆土屬止有左州

養利州永康縣三處雖係流官尚仍土俗即有差役公費臨時照村派辦而崇善一縣雖在附廓亦無均徭里甲兵款驛傳等項以上二府州縣差役公費雖非徭編之數亦應量爲議減其餘各府州縣一應可省之費及近奉裁革督糧叅政永寧兵備副使各員下柴馬門皂轎夫等役并到任執事等項銀兩俱行議革較之往時已省十一似爲調停適中經久可行等因并造冊呈報到臣該臣會同巡按廣西監察御史李東議照廣西地土瘠薄

物力凋疲均徭里甲兵欵驛傳一應經費銀兩前
此編派原比中州獨嗇而舊習因仍未免冗費猶
存茲者荷蒙

皇上軫念民艱

特允部科之請行臣等清查議革臣等敢不仰體

德意悉心清理期臻實效以爲經久之圖緣各屬地
方漢土雜處民俗旣殊編派亦異如思恩軍民府
九土司與太平府所屬俱係土官衙門而左養永
康三州縣雖係改流與崇善縣原無均徭里甲一

應差役公費皆仍土俗出辦姑各聽從其便及原額未載者亦量議增入其餘應存應減應革各條款臣等逐一覆加參酌固不敢裁削過多以貽窒礙之患尤不敢糜濫無節以重閭閻之苦今計通省均徭里甲兵款驛傳各項每歲原共編銀一十九萬二千一百四十七兩一錢九分八釐二毫九絲一忽一微減革過銀一萬八千八百二十九兩一錢九分五釐七毫五絲又新增銀八十七兩六錢實該減革過銀一萬八千七百四十一兩五錢

九分五釐七毫五絲新增并實編共銀一十七萬三千四百零五兩六錢二釐伍毫四絲一忽一微除將清查過實編減編銀數造冊送戶部覆覈外相應具題伏乞

勅下該部再加酌議上

請行臣等刊布成書通行各屬永爲遵守以後有司官如有仍蹈前弊私自加派者臣等據實論黜決不敢姑息容隱以重民困庶費出有經法制垂久而邊民獲賴少蘇矣

十寨善後告成併敘錄效勞官員疏

題爲十寨善後遵奉

欽依告成併敘錄效勞官員事據廣西按察司整飭
右江兵備兼分巡道副使劉世賞布政司分守右
江道右叅議彭應時會呈爲酌議十寨善後事宜
以圖久安事先奉案驗前事并准布按二司關照
轉行到道已經遵照舉行及該二道詳委柳州府
通判胡中總理善後建拓鎮城事務思恩府同知
鄭一濂清丈田畝去後又奉軍門行委梧州府通

判賈德卿督協各官分投幹理續據各官呈報三鎮城工於萬曆八年十二月內事竣畢工新建叅將衙門及南丹衛所工程俱於九年五月終畢工等因隨同叅將李應祥擇取六月初七日催督南丹衛官軍一齊遷入三里新城居住各官即於初十日齊赴新衛所衙門到任訖續據同知吳譽聞呈報稽查過叅衛二署工程與分撥屯田及善後錢糧各項文冊到道復該二道會同遵照先今題議事理一一叅覈磨對逐欵登答開造手開一

款設三鎮以重彈壓內稱建立過思吉鎮城一所
周圍一百六十丈內前後官廳廊房公館俱全又
建立過古蓬鎮城一所周安鎮城一所俱如思吉
鎮城制而以土巡檢常應鰲領兵目常把等一千
名住守思吉鎮以土巡檢常顯能領兵目常屯等
一千名住守古蓬鎮以土巡檢黃馮領兵目梁廖
等一千名住守周安鎮一款屯三里以樹聲援內
稱建立過三里叅將衙門一座內大門儀門正堂
後堂各三間左右廊房各五間住宅二大座廊廚

小房八間書辦房六間中軍把總廳房各三間營房二十間土地祠一座鼓亭二座照牆一面安邊鎮遠牌坊各一座又築過龍蛤堡左右二營而以哨官韓景淳杜鵬各領兵一百五十名守之築過哱咳堡左右二營而以哨官劉繼王忠信各領兵一百五十名守之又分築過三拗田州等處一十二營墩臺二十四座一款分信地以重責成內稱分布過思恩叅將領標兵一千二百名駐劄三里地方原任都司王堯臣領營兵二百一十名分劄

遷江來賓地方一款遷衛所以振武威內稱徙建
過南丹衛所一處內正廳後堂各三間兩廊吏舍
六間大門儀門各三間旗纛廟三間照牆一面經
歷司前後廳各三間東西耳房各三間臺門一座
千戶所前廳三間東西軍牢房各三間臺門一座
合衛官軍指揮三員陞任指揮二員致仕指揮一
員千戶四員百戶三員應襲舍人十七名馬步旗
軍三百零六名舍餘三十名軍餘三十名各該衛
舍軍房俱係各官軍領銀自造一款開道路以通

險阻內稱開闢過道路三里鎮東路至賓州七十里北路至周安鎮七十里至思吉鎮十里至慶遠府四十里西路至安定司四十里至思恩府一百四十里南路至上林縣四十里各設立營堡東路則設琴水路車二堡龍蛤等六營西路則設良舉哱咳等五營北路則設羅墨高陽等六堡各設立橋梁津渡自慶遠以達羅墨皆賊人舊巢俱砍伐菁林鑿平山石以通往來而行旅止宿各有依庇一款議屯田以示優恤內稱丈量過龍蛤哱咳二

堡熟田二萬七千九百五十五畝二分零併李佛
嶺以北賊占荒田俱屬之南丹衛以爲新屯其原
額坐落水南者爲舊屯至於黃村一帶田土仍給
上林縣舊民耕種爲業以免該縣更易版籍之繁
該縣久失額田糧六百餘石盡與除豁南丹衛舊
失額屯粒亦與開除通於新屯內徵納子粒照依
今議每田五十畝科米六石共子粒三千三百五
十四石六斗三升五合六勺四抄一款議錢糧以
裕經費內稱營造三鎮城署共實用過工價銀九

百一十三兩三錢九分四釐叅將衙門南丹衛所
及各處墩臺共實用過工價銀二百六十二兩三
錢五分四釐支給過兵餉自萬曆八年三月始至
本年十二月止共支給銀七千六百四十一兩一
錢五分五釐零支給米九千九百七十九石四斗
五升四合獎勵過督工官銀二十九兩賞功銀一
十六兩支給過各官廩糧及各人役工食銀二百
三十九兩零三分八釐支用過運米脚價銀自賓
州運至三里城該銀八十二兩八錢六分自思恩

府運至三里上林該銀三百四十一兩五錢六分
三釐二毫自武緣縣運至三里上林該銀三百九
十六兩一錢五分五釐八毫八絲俱明白銷算會
呈前來又據二道開報叅將李應祥等陸續生擒
漏刃大賊首周公殿等四名斬級二顆小賊首級
六顆從賊級一十五顆撫插過殘徒八百零四名
內叅將李應祥撫過思吉羅墨等寨殘徒樊公津
等四百零七名原任都司王堯臣撫過通津洛西
等峒殘徒常公凌等一百七十二名叅將倪中化

撫過北五上下等里殘徒常扶住等一百一十二
名守備童元鎮撫過夷江風木等村殘徒常公謀
等一百一十三名各撥田耕種安插俟三年之後
收爲編民一同開坐造報所據前後效勞有功人
員請乞分別議敘以勵將來等因呈詳到臣除實
授土巡檢加陞縣治與夫掣散土客兵及各兵餉
種具歷年支用過銀兩相應造冊 奏報者俱俟
三年之後另行議 題外臣會同總督兩廣侍郎
劉堯誨巡按廣西監察御史李東議照十寨土田

淪入賊巢者二百年矣而鄰於寨者如南丹衛賓
州夷江上林等縣數遭侵犯疆界無稽官民日失
其序今荷

皇上神武一舉而討平之議以其地設爲三鎮授之
土人世守談總督撫按官會議善後七事開款具
題荷蒙

皇上俯從部議備行臣等及時舉事以終前功茲者
百旅雲屯三城鼎峙土民耕鑿於中者人皆寧宇
將領彈壓於外者責有專城戎衛徙方而居食益

裕故衆至如歸民田復業而疆場不移故按堵如故是皆仰遵

謨議俯察方隅因勢而利導之務通民志與時而潤澤之務去成心以致百役奏能羣工展采化菁林爲沃壤變椎髻爲王民保有前功足垂永賴所據用事各官相應敘錄以彰激勸除陞遷去任及經歷典史千百戶等官聽臣等徑自獎賞不敢一一煩

瀆外看得廣西按察司整飭右江兵備兼分巡道副

使劉世賞布政司分守右江道右叅議彭應時副
總兵管思恩叅將事署都指揮僉事李應祥任事
而謀斷相資分猷而才誠俱合雖歷官先後而用
志專平拮据之態尚存暑雨之勞足念此三臣者
所當首敘優加賞賚者也思恩軍民府同知吳譽
聞梧州府通判賈德卿賓州知州饒敬承或犯險
以啓山林或投艱而親土木百雉之城旣固三壤
之賦惟均此三臣者所當敘錄賞賚者也思恩軍
民府知府鄭國臣慶遠府同知陳應魁柳州府同

知漆文昌慶遠守備今陞鎮守廣西總兵標下坐
營中軍官署都指揮僉事童元鎮上林縣知縣李
三樂來賓縣知縣潘思誠武緣縣知縣黃約南丹
衛掌印指揮劉安邦選徒戒具俱有成勞稱畚耒
糧咸資分理以上八臣所當併敘賞賚者也內劉
安邦事當創始力贊有終率先遷徙之功尤爲勇
往仍應紀錄以旌趨事者也如蒙伏乞

勅下兵部再加詳議將副使等官劉世賞等分別賞
錄庶忠勸者知有所勸而任事者益淬礪於將來

矣

城險要以屯駐將官併敘效勞人員疏

題爲城險要以屯駐將官併敘效勞人員事萬曆九年六月內據廣西分守蒼梧道右叅政胡維新兵巡道副使吳哲呈稱節奉督撫軍門憲牌督催原議廣西岑溪縣連城鄉地名大峒增築城垣建立叅將衙門公署營房等項工役於今五月內隨據原委坐營都司周勲梧州府通判向天明等各報稱經理完備即行委梧州府推官徐雲山前往

查勘相同開造文冊具申到道覆覈無異內開築完甌城一座周圍一百七十餘丈城樓四座敵樓四座外城圍牆二百四十餘丈開四門上設更樓四座鑿濠池周廣如其城之數又叅將行營一所將臺一座坐鎮公館二所兵營房六十間又北科坐鎮營場一所官廳三間大門一間營房三十間又開闢過道路自赤黎營以至馬嶺謝村大峒佛子北科平河等處水馬官路各七十餘里又建置過營堡自赤黎河又思里木埔山心魁握乃平等

處共營堡三十所墩堠二十二座脩理過橋梁一十四處又開懇及清出田糧連城鄉上中二里并各徭田共七頃零五畝七分該糧二十六石四斗六升三合七勺五抄北科等峒田一十四頃一十七畝一分該糧六十石零六斗五升外開荒田糧二十石零三斗孔札小峒等處徭田三頃四十八畝二分該糧一十四石九斗俱已給授新募土兵常月等八百名及土人梁乾香徭人唐宗珊等領耕住守又撫插過連城七山北科等處徭人共四

千二百七十一名俱逐項開造外又該二道議得
岑溪縣連城鄉六十三山七山等處各該猺獞先
年交通廣東羅旁巢賊流毒兩省罪在必誅第因
大征之後連城各獞相率聽招以至六十三山等
獞一時亦委順向化故皆待以不死而狼子野心
終難馴服乘機竊發每有異謀茲幸軍門長慮却
顧熟思審處謂勢當居重馭輕始相地形于大峒
謂事必一勞永逸增建城府以峻防遣將布兵建
城列署遂使兩省通賊穴巢屹爲百年壯固保障

况遠近醜類失險摧堅猺夷皆爲赤子來歸者已
四千餘家土田可入版圖冊報者及二千餘畝昔
議養威蓄銳必費十萬兵糧勦而後可今則招徠
懷服罔遺尺寸矢鏃坐以受成似此忠猷允紓

宸顧事關永利宜合上

聞所據任事各官呈乞敘錄以勵勤勞又查得大峒
去岑溪七十里孤懸萬山之中今道路開通夷猺
投順然非設營置守聲勢相援恐無以消反側而
杜中梗又叅將原爲潯梧而設往來策應不宜盡

其部兵布守令大將兀坐空山而專事彈壓耳所
有原設天堂赤黎等處大小十二營共兵六百一
十二名向皆爲防守岑溪以控制諸徭也今道路
平寧縣防可以稍減惟天堂根子二營每營選募
精兵一百名以防護縣城餘皆掣入聯守新闢道
路自赤黎至大峒內設河又思里木壩山心魁握
乃平六營每營與兵七十餘名惟乃平魁握二營
切近大峒則以原兵巡道操兵二百名分布防禦
尚有指揮朱絳原領兵二百三十名坐鎮連城今

既設城府於大峒則連城鎮可撤合無就將朱綵
充爲叅將中軍官協守城署令叅將得專統部兵
八百名往來於潯梧兩郡不復內顧而北科坐鎮
中軍通至羅旁排阜等處營堡則有常月等耕兵
住守如此則戍梧狼兵及五屯所僮兵可以盡數
掣回各守信地矣等因轉詳到臣諒臣會同總督
兩廣侍郎劉堯誨巡按廣西監察御史李東議照
得岑溪介在兩粵惟是徭獠矜獍之與居州里之
間強半異族連城大峒等鄉地當兩省之交山谿

遮絕號稱沃土自近年奔以與賊而其險在彼故
自羅旁封門以西直出於蒼梧岑容藤博及高雷
之間皆其宅窟喘息相通互爲障庇此其勢固不
能窮誅也然其懷土戀生若安集得宜控制有術
反資其力而使之自爲守也今新築大峒鎮城開
衙建宇不但爲將領屯重之計耳而險阻旣夷商
販無阻往來冠蓋相望于道則蠻夷瘴癘之鄉一
旦化爲周行孔道則其險自失且足以制其死命
因而誘化慰止之固甚易也善後久安之術無出

於此潯梧叅將原駐劄潯州以左江事重也今既
改駐岑溪開設衙門于大峒則其去潯日遠且大
峒旣設叅府則連城坐鎮千戶朱綵相與同處一
城則冗也合將朱綵仍以千戶職銜充爲叅將中
軍官專聽該叅調度常在鎮城領兵協守該叅提
兵二營往來於潯梧之間無事則駐守鎮城以示
彈壓官不加增事尤統一似爲計之得者各山清
出田地開耕成熟三年之後照畝陞科其募到耕
兵常月等八百名自四月起各給與糧食種具等

銀每月四錢俟九月收成之後停止各照所給田
土耕住三年之後亦一體陞科各兵俱統於叅將
管領調用其前後攄謀任事之臣如分守蒼梧道
右叅政胡維新兵巡道副使吳哲先帶管二道印
務按察司兵巡右江道副使劉世賞接管印務布
政司分守左江道左叅議陳尚伊皆資其成議效
有實勞所當賞賚以示勸酬者也帶管潯梧叅將
事兩廣軍門坐營都司今陞廣東遊擊將軍署都
指揮僉事周勲梧州府掌印知府陸萬垓捕盜通

東華集 卷五
三
判何天明經理有方心力俱竭內周勲何天明身
親板畚旅宿瘴鄉所當併敘賞賚而陸萬垓何天
明尤當一體紀錄者也岑溪縣知縣何士瞿蒼梧
縣知縣龐一夔藤縣知縣陳雅言容縣知縣伍可
受亦當併加賞賚者也其餘領兵指揮等官李汝
賢朱綵等及專理工作縣丞等官張成德等俱聽
臣等分別量行獎賞不敢一一具

瀆如蒙伏乞

勅下兵部覆議如果臣等所言不謬將坐鎮連城千

戶朱綵改爲叅將中軍官常在鎮城協同守禦其
潯梧叅將無事駐守鎮城有事則提兵往來潯梧
仍與廣東西山叅將相爲援應有警互相關報合
兵追擊無分彼此乞於本叅

勅書內改註明白以便遵守所敘效勞各官查照賞
錄以勸從事之賢者而勵其餘也謹題請

旨

責成徵解協濟糧銀疏

題爲協濟糧銀逋負數多懇乞比例責成徵解以

濟邊餉事據廣西布政使司呈稱照得本省土瘠
民貧歲用軍兵糧餉率賴外省協濟先年湖廣布
政司每年額派長沙衡永常德等府所屬州縣協
濟本司折糧銀一萬五百兩至隆慶五年爲始議
改衡州府屬衡陽衡山耒陽藍山臨武鄢縣安仁
常寧桂陽九州縣共派額銀七千四百七十三兩
九錢六釐二毫四忽一微永州府屬寧遠零陵東
安祁陽四縣共額派銀三千二十六兩九分三釐
七毫九絲五忽九微迤年徵解多不足額或完欠

相半或完十之三四甚有完十之一二者節經具
呈撫按衙門移咨湖廣撫按兩院備行彼省督糧
道催徵起解竟未見報計查長沙衡州永州常德
四府所屬歷年共欠銀四萬四千一十九兩六錢
以致歲入之數不足以供歲出之需軍兵廩糧工
食委曲那支終不能給查得湖廣長沙衡州二府
并彬州各屬例有協濟貴州糧銀先年州縣自解
亦多不完萬曆六年該巡撫貴州都御史何起鳴
議將湖廣協濟糧銀改歸湖廣布政司及糧儲道

貴成各府州縣印糧官徵完開報布政司給文差
官類解貴州布政司交納年終冊報戶部將該管
印糧官止計協濟未完分數查叅已經題奉

欽依通行協濟郡邑遵守較之曩時事有貴成糧亦
易辦今西土之貧不異貴州而軍需之費又或過
之所據額派湖廣協濟糧銀實與貴州事體相同
似應比例議處呈請具題貴成徵解以少濟邊
餉等因到臣該臣會同巡按廣西監察御史李東
議照粵西地方山川險阻猺獞盤據而桂平柳慶

四府皆與湖廣之衡永保靖郴桂各境壤比接夷情最重列戍屯兵固所以爲粵亦所以爲楚也先年額調湖廣各衛所官軍五千員名更番戍守而又額派協濟糧銀一萬五百兩以充兵餉蓋唇齒相維輔車共濟勢固然也但相沿歲久有司不知原派初意未免彼此二心又以無所責成益滋玩愒或小民拖欠而姑息示恩或已徵在官而那移別用以致節年積逋計四萬四千一十九兩有奇文移之催促徒繁州邑之玩延如故若不亟爲酌

處逋負益多司帑益匱竊恐兵食不繼兵防護踈
夷情因而騷動不惟粵地多事即湖南郡邑寧免
震鄰之虞乎誠不可不爲之深長慮者旣經該司
查有前例具呈前來相應題

請伏乞

聖明軫念邊儲重務

勅下該部再加查議將湖廣衡永二府屬協濟折糧
銀兩自萬曆九年爲始照依貴州類解則例改歸
該省布政司及糧儲道責成各府州縣印糧官員

如數徵完開報該司給文差官總解廣西布政司
交納每年務取足一萬五百兩之數若謂衡永二
府鄰近廣西而去湖廣頗遠往返勞費則免其解
司就于各府類齊差官起解仍取通完庫收申報
該布政司知會其萬曆八年以前年分見徵未完
糧銀嚴行各屬勒限催徵如有侵欺那借等弊該
省布政司責令追究銀兩一併起解接濟兵食每
年終廣西布政司查將衡永各府州縣掌印管糧
官員職名完欠數目呈報臣等覈實報部查照逋

欠邊糧分數事例住俸降罰庶事有責成人知儆
惕而邊餉獲賴有濟矣

東歐報捷疏

題爲逋寇爲梗官兵奮勇追勦

請乞敘錄并申嚴禁令以峻邊防事據分守右江道
廣西布政司右叅議彭應時整飭右江兵備兼分
巡道按察司按察使周浩呈稱照得粵西夙稱多
盜惟柳郡爲尤甚近歲十寨蕩平北五底定地方
稍賴以安輯矣有馬平縣三都僮賊常生朋等先

年征勦漏刃竄匿寨峒遺下田土議立都樂曹顏
二堡招兵耕守各賊屢謀據奪原地不時糾合東
歐銅其思籠及五都獨山大產穉里等巢惡賊李
公壇李公孕常公旦蒙公占藍公噠常朝洞常萬
波周萬占藍章榮等肆行劫掠隨撫隨叛於萬曆
八年八月內突出慶遠江道捉虜生員彭佐王安
邦入巢併殺死護送軍兵船戶四命隨行撫追方
將生員送出又執虜馬平縣民何汝器何汝化錮
禁深巖勒銀贖放至萬曆九年正月初三日有柳

州府罷閒鄉官知州夏宗龍同義男夏招弟往都湖僅村回至人頭嶺被常王朋等執拿寄藏東歐耨里險峒挾退兵堡田土隨該二道呈奉督撫軍門各督發標募官兵齊至柳州聲其罪狀示以必誅及查究該管哨捕員役責限追取彼賊自度計無所施遂將夏宗龍與夏招弟放還時方遵奉

明旨議行丈量田畝即欲舉勦恐因兵戈致違

欽限揭稟軍門計擒首惡餘黨姑從寬宥以免驚動隨縣賞密購將首賊常王朋擒獲解報訖當差名

色干總沈玉池抵巢撫插餘黨詎意各賊恃險不
服撫處將沈玉池執禁追至曹顏堡近地殺死復
聚劫古息鄉梁舉家虜去妻子耕牛殺死二命吉
利村譚妙顯家虜去人口牛隻殺傷一命馬峽堡
塘邊邀奪遷江民婦黃氏又剗劫梁定虞貴松等
家牛馬假以報讎結引大產村賊將九龍村良犢
房屋禾倉放火燒燬時有來賓縣知縣潘思誠親
往古息鄉量田夜宿郭村梁思家被各賊糾同北
三峒殘孽與東歐各處惡徒突來謀劫潘知縣彼

時驚覺賊遂用槍從門隙戳傷跟隨人役潘進楊
魁有來賓所千戶方紹勲在彼丈量屯田督集軍
兵追赶擒獲賊犯譚公傑譚扶關二名解道審吐
係與東歐諸巢撞賊約合常王朋殘黨意圖劫官
奪印等情各賊仍尚窺伺結聚不散聲言邀劫比
新任兵巡道按察使周浩十二月初三日到任先
經議委分守道右叅政彭應時帶管兵巡道印務
看得正當清丈之際惡賊恣肆跳梁如此若不乘
勢追勦未免遠邇交煽奉委各官風聞自顧軀命

無敢一履僮境且恐各處頑梗之徒觀望動搖不
遵丈勘事將阻格難完隨查訪得各賊勾引出沒
多係大產獨山藉里諸村巢而東歐銅其負險窩
藏實爲逋逃淵藪俱應剪滅以絕禍根先奉督撫
軍門密示方略相機從事適調到江州上映下雷
三州峒目兵戍守省城道經柳州郡及調出東蘭南
丹那地三州土兵防守柳州一時畢集機會可乘
一面具由通詳三院批允審度事勢便宜勦處就
經移會分守柳慶地方叅將金丹督發赴戍土兵

及尖山馬鞍都樂曹顏各堡標募猛兵委官分領
分守思恩管理叅將事副總兵李應祥督發標湖
營及遷江所土兵馳赴策應牌委慶遠衛見問發
南丹衛立功指揮陳良璧督率忻城縣土官男莫
鎮威永順司副長官彭大武土舍鄧富强各領兵
協勦尅期四面並進尤慮賊易奔竄復行慶遠府
差千戶童養正等督兵要路堵截又牌行慶遠衛
指揮王天寵督兵把都博以防南鄉之逸柳州衛
副千戶嚴惟忠督兵伏來賓隘徑以遏北五之衝

又行委柳州府同知漆文昌往忻城縣稽督各該官兵及分發旗榜差人守護無干巢寨毋致驚畏窩藏助惡隨奉巡撫軍門會行鎮守廣西地方總兵官王尚文督發把總邵濱周大用統領標兵五百餘名馳來協助調遣又奉總督軍門牌委坐營都司洪夢鯉前來督察軍務該本官到哨申嚴軍令飭勵將士續准叅將金丹報稱分委柳州衛指揮張茂功等統領官兵各於十一月十一日夜在柳州府發哨直抵里高地方用本村獐老常榜朗

等作爲嚮導分哨取道進攻銅其皂嶺上卅下卅山口等峒見賊據險結巢飛矢如雨當有名色把總吳一元率兵奮敵於十二日克破生擒首賊二名蒙公亨常閑斬獲首賊常公訥等功級共五顆從賊級七顆餘賊奔往板社喬拱黃峒等巢恃險結聚分布官兵圍攻未下該職親履各峒督令各兵砍木截竹置造梯橋火炮彈弩分投攻擊賊始大敗生擒首賊常公旦姪常銀漏常料二名斬獲首賊蒙公占等并從賊首級共一百零四顆又偵

探板夾石牛思籠等巢賊徒盤據山巔嚴督指揮
吳國勲陳良璧等官兵攻擊生擒首賊常狂羅滿
潘扶廣常朝洞四名斬獲首賊蒙重金等并從賊
首級共一百零九顆哨官李層一土舍常志隆等
兵攻搗馬澗大峒擒斬首賊常扶林覃老德潘之
懸常扶悶等六名顆從賊級二十五顆又督指揮
張茂功王承勲率領下雷官目許宗蔭等把總邵
濱吳一元等官兵追勦大產洛滿獨山等巢官兵
奮鬪三日二夜克破斬獲首賊周萬占等功級一

十一顆從賊級六十九顆把總吳一元面傷一刀
臂傷二槍餘賊逃遁各處巖峒乘勝督令各該官
兵搜勦生擒首賊藍公報藍重想二名斬獲首賊
常金豹等弁從賊首級共四十九顆又督把總吳
一元邵濱弁三州目兵追剿耨里磨里生擒首賊
藍章榮一名斬獲首賊常召眉等功級九顆從賊
級二十九顆又據指揮陳良璧報帶同忻城土官
莫鎮威上映峒目兵攻剿涼陰窯灰木羅等巢生
擒首賊一名梁力殿斬獲首賊常公豹等功級六

顆從賊級三十六顆奪回被虜柳城縣民人一名
全扶晚又據哨守雄迎堡千戶嚴惟忠呈報率兵
在于軍子山斬獲有名遁賊常七國等首級七顆
俱經委官紀驗前後擒斬共計四百八十四名顆
其積年渠魁均在數內陣亡哨官隊長目兵十一
名被傷把總一名哨長目兵四十八名奪回被虜
一名俘獲賊屬三百名口牛五十三頭馬一十三
匹器械一百三十七件隨已撤兵回還各信地防
守等因又准管理思恩叅將事副總兵李應祥報

稱准本道手本發兵馳往策應隨調防守三里標湖等兵齊至遷江於十一月十三日五鼓發哨分委遷來督備指揮李時中督領一枝由北三官田進本職親督領哨千戶陳嘉猷名色把總劉志富等官兵由北四吞塘進各抵東歐銅其地方策應勦捕偵探賊遁蹤跡至東歐古平山寨卽發千戶陳嘉猷等官兵截剿當陣生擒首惡李公孕係李公壇嫡弟斬獲從賊級九十一顆奪回被虜來賓縣民梁舉妻一口又據指揮李時中呈報督發指

揮黃祐等甲兵在於地名石疊山口突遇遁賊一
宗約二十餘徒督兵奮勇截殺斬獲有名大賊首
李公壇首級一顆從賊級一十九顆又據哨探兵
拏獲被虜今脫回一名王勝報稱東歐銅其等巢
逸賊遁聚古峻深巢負險自固督發指揮李時中
千戶陳嘉猷各簡精兵齊抵該山攻剿適原調思
恩白山那馬等九司土兵繼至兵氣方銳分兵四
面圍攻斬獲賊級一十三顆餘賊奔投北四大潘
山結黨拒戰當卽踰追被烏銃火箭攻敗斬獲賊

級五十三顆共擒斬首從賊級一百七十八名顆
俘獲賊屬一百三十七名口奪回被虜二名口奪
獲賊仗一百零七件陣亡兵五名被傷兵七名等
因各到道爲照各賊肆志而挾侮官府流毒以戕
害士民罪惡貫盈神人共憤茲者仰仗軍門勝算
鼓舞羣心遂使渠魁就殄孽黨伏誅兵力無事於
遠徵軍餉不煩於多費上伸

朝廷之威下舒衆庶之憤平時桀驁諸夷相率輸誠
投見認納錢糧而各州邑逋慢之徒咸願奉行清

文罔有越志二郡肅然其一清矣各村驚散猺獞
給示安撫復業據十冬撫安緝事人等招出漏刃
殘徒潘公累等十三名驚逃猺獞藍萬勞等十七
名各帶赴道發回原地住種尚有未歸殘徒見在
招徠安插其善後事宜如東歐阜嶺銅其等處俱
屬要害責令忻城縣土官男莫鎮威遷江所土官
舍黃中裳等立堡自行出兵耕守馬平縣五都洛
湍大產獨山耨里勦絕賊遺田土責令該管里冬
召人耕種辦納糧差另議呈詳外所據效勞人員

呈乞敘錄以示激勸等因到臣通計前後擒斬首
從賊人賊級共六百六十二名顆俘獲賊屬四百
三十七名口牛五十三頭馬一十三匹器仗二百
四十四件奪回被虜三名口除將各殘徒悉行撫
回安插善後設兵防守諸事臣等督行該道一面
舉行生擒賊犯鞫審明實照例押赴市曹斬首梟
示賊級行按察司委官紀驗候巡按御史覆覈賊
屬牛馬變價充賞獲功軍兵器仗貯庫奪回被虜
給親領回陣亡被傷哨官目兵照例優恤訖該臣

會同總督兩廣侍郎劉堯誨議照粵西山川紆鬱
猺獞侵據無地無之數年以來

皇稜震疊遠邇嚮風當此清丈之時如桂林平樂各
府所屬州縣猺獞請官丈田供稅無異齊民蓋曠
古以來所未覩也惟右江馬平縣獞賊韋王朋一
黨本三都逋孽也倚東歐爲巢穴恃大產爲羽翼
逞其桀黠時肆猖狂往歲截路劫村罪惡難以悉
數已復執留罷宦夏宗龍脅退堡兵勒求田土告
以夏宗龍爲田主臣等察知奸計堅執不許延至

數月始將夏宗龍放出臣等猶念其冥頑姑擒首
惡以正法典餘黨悉從寬宥不謂負固怙終不服
撫諭反將撫安沈玉池殺死仍復糾黨謀劫丈田
縣官雖幸無虞然其恣肆跳梁亦甚矣蓋亦執留
鄉宦故智必欲盡奪三都之地無容清勘而後已
誠人心之所共憤

王法之所不容也道衆各官目擊其艱因臣等便宜
之示決策剪除值戍兵偶集之時乘機追剿不煩
徵調不費轉輸常王朋先已就擒李公壇繼而擒

首擒斬幾及七百俘獲四百有奇示茲創懲足寒
反側之膽因而良善益堅歸附之心三都之田土
可清諸邑之丈量無阻矣茲皆由總督軍門威猷
震懾號令嚴明遣勁卒以壯先聲折衝千里委坐
營以司督察綏靖百蠻而總兵官王尚文始而請
兵親受成於制府繼而抱疾猶勵志於封疆以故
得權變之宜而底神速之績也緣兵非得已功出
偶成不敢輕敘所據道叅等官之勞委有不可泯
者如分守右江道右叅議彭應時先事善謀持重

允符兵計臨機能斷指麾悉中夷情分守思恩地方管理叅將事副總兵署都指揮同知李應祥籌略素優趨命不辭艱險部分有法攻堅如拉朽枯分守柳慶地方右叅將署都指揮僉事金丹志銳勲名力任除兇之責身先士卒懋成破壘之功以上三臣功當首敘優加賞錄內彭應時終歲苦心金丹一方專豁其勞勩尤多者也整飭右江兵備兼分巡道按察使周浩莅事方新民艱共切未與勞於征勦均協慮於撫綏總督軍門坐營廣東都

司署都指揮僉事洪夢鯉楊威令而紀律益明贊
機宜而芟夷有賴以上二臣所當次敘併加賞賚
者也柳州衛指揮僉事張茂功吳國勲王承勲李
時中慶遠衛署指揮同知見問發南丹衛立功陳
良璧南丹衛中左千戶所正千戶陳嘉猷領兵名
色把總邵濱吳一元鼓舞以深入危巢同心靖寇
率衆而親冒矢石戮力除殘以上八員俱應敘賞
內陳良璧部獲功級獨多相應准其贖罪者也柳
州府知府陳大猷慶遠府知府高文炳柳州府同

知漆文昌柳州府通判宋和慶馬平縣知縣勞守
謙或備運以給供需或設伏以防奔突或撫安而
善其後或紀驗而殫厥心以上五員所當並敘賞
賚內同知漆文昌計畫經營勤勞尤至者也忻城
縣土官男莫鎮威倡義滅賊力任善後之圖下雷
峒土官許宗蔭矢志立功身先赴敵之勇以上二
員所當議加賞錄以作其忠者也其餘隨征効勞
經歷照磨指揮千百戶把總等官聽臣等分別獎
賞間有擒斬功級通候覈實紀敘外如蒙乞

勅兵部再加查議將前項有功官員分別上

請俯賜賞錄庶將士益勸無敢有玩寇殃民者矣再
照先王之制詳於治內所以峻防而杜釁者意甚
微也右江地方先年徭獍猖獗道路戒嚴非官兵
哨護不敢通行從來久矣近歲地方稍靖人起玩
心軍民人等率與徭獍往來無忌至衣冠之族亦
多深入獍地收取租禾者日漸月滋奸僞萌起間
或急於需求而釀成讎怨或過於恐嚇而致令驚
疑亦或有播弄誘惑爲占田奪地之謀而因以爲

利釁端旣開一煽百動强者糾衆自逞弱者假手
於人邀執劫奪之患往往有之不曰復業則曰報
讎此其罪豈盡在猺獞哉又有猺獞熟識者出入
於郡城田主債主之家日不下百數十人其去其
留莫可究詰軍民恬然不自爲慮不知喜人怒獸
夷性之常鴟梟不鳴要非祥也豺狼不噬要非仁
也彼習見官府之情狀兵防之虛實與士民之居
處服用陰伺竊聽能保無垂涎之心乎以故官府
意向稍有所指而巢寨在一二百里外無不知之

早而防之堅者凡以徭獐往來通透所致也萬一
不戒其患詎止於虜人禦貨已耶諸如此類有司
皆知之而不能禁憂之而不敢言者蓋居民以爲
彼等衣食租稅皆係於斯其勢不得不相來往是
殆狃咫尺之見而忘尋丈之思也臣愚謂軍民往
來獐村固難盡革而鄉宦生員通往之禁不容不
嚴獐獐出入城府固難盡驅而城門譏察去留之
法不容不謹臣已嚴行禁示矣但人情每樂因循
法守易至阻格臣請不追既往必警將來申嚴禁

令無容少犯始可以峻出入之防而免窺伺之患
併乞

勅下該部酌議行臣等督行守巡該道曉諭官民人
等永爲遵守今後凡鄉宦生員等家與猺獞收取
租禾等項許令家屬代徃不得親入寨峒自蹈危
機其猺獞出入府城守把城門官軍嚴加譏察置
立門簿某日猺獞某人徃某家本日曾否出城或
住歇某家逐一登記守巡官時時弔查遇有出入
不明即行追究如豪强抗違庇護及細人煽誘交

通情弊應拏問者容臣等拏問如律庶奸宄潛銷而地方免於多事矣

議設土司鈐束撫獐疏

題爲議設土司鈐束撫獐以控三省要害事據廣西布政司右叅政兼按察司僉事仍管府江兵備兼分巡道事陳應春呈據平樂府通判朱應辰呈稱賀縣里松等八峒諸獐雖已招撫向化立里輸糧而流來無藉之徒多潛藏其中原管招主又每每入峒欺騙錢糧飛洒加派追徵則侵匿入已遁

負則推諉。僇民及小販遊手之人。假事入峒。無端生擾。在彼日夜不安。而思欲得所莫爲之計。及查恭城縣勢江源賀縣樊家屯近年各設土司坐鎮夷民相安。應合比照設立一土司彈壓。有事即與處分。情不能訴者爲之轉達。凡有府縣拘喚牌行本司可免差人需擾。應徵錢糧帶出自納可免排年侵欺。上不慮有反側。下不慮有災危。彼此兩安。地方有賴。隨查有賀縣名色把總黎邦伯曾經差委入峒曉諭丈量。頗諳彼中事情。就行令本總親

到里松喚集談峒峒老及細小人等傳諭就據里
松西田牛寨等峒種老廖道珠等會結稱本峒自
先年大征道珠等係脅從餘黨賴有排年鍾玉隆
撫招下山安插住種告設里松鄉編立排戶輸納
國稅後鍾玉隆徵收侵負蒙申革退僉點排年黎運
資接管仍前需索糧多侵匿今已身故本峒地方
久未得人宣達加以棍徒虛張聲勢致使全峒疑
畏近蒙軍門赦宥舊非許爲良民本峒大小感荷
再生之恩誓竭赤心之報正欲投告作主幸蒙齎

牌傳諭合峒男婦老少懽呼復見天日輸糧向化
永作良民乞依樊屯勢江事體設土司立社學約
束教訓永圖安生把總黎邦伯曾蒙委入本峒公
幹正直無私願得立爲土司可能撫恤保安世作
峒民之主等情遞結具呈到道批行該府知府周
祈覆議前來該本道議看得賀縣里松等八峒有
衆二千餘人聯絡湖廣之衡永廣東之連陽開建
蒼梧之懷集山箐幽深狃獍盤據昔多負固爲惡
近蒙軍門赦其舊惡許以自新今皆聽撫向化立

里輸糧頗同邊氓但本峒遼闊距縣最遠其中尚有梗化之徒四方亡命從而煽惑招主排年因之欺騙卽撫獐有情不得上達而官府之意彼亦未能仰體也所以懾其邪心通其下情者惟立土司以鈐束之斯爲得策况查賀縣樊家中下屯恭城縣勢江源各有猺獐數千堅巢稔惡四出爲梗近各設立土司據其腹心行委義官尹湯卿於樊家中安鄉冠帶舍人朱仕良於樊家下寧鄉劉理於勢江源各建設衙門准以副土巡檢名色駐鎮移

妻子世守其地不煩兵戈而徭夷帖服不設兵堡而地方敕寧蓋流官之更遷不常土司之坐守相親故諸夷樂就土司約束其效已章章可據今里松必如樊屯勢江事體設司鎮壓庶彼此相安地方永利先經通判朱應辰呈議名色把總黎邦伯頗有身家素諳夷情峒民廖道珠等又連名保結願屬約束該府覆議相同合無於里松峒相度適中處所建立土司衙宇行令冠帶名色把總黎邦伯移家住守管束獯民如有不平事情卽爲轉達

處分應徵錢糧帶令赴縣親納中外無賴棍徒毋
容潛住生事其編立保甲創建社學聽委官兼同
本總次第舉行仍於本峒界近湖廣江華等處隘
口設立一堡移兵五十名哨探守把以杜釁萌及
照恭城縣勢江源諸徭先該本道議呈督撫軍門
詳允建立土司行令平樂千戶所冠帶舍人劉理
見在管束徭民但未經題

請誠恐事久易玩呈乞一併具題永爲遵守如各
總舍撫馭得法徭僮信服三年之後准以副土巡

檢職銜世守其地以酬勞勩等因呈詳到臣該臣
會同總督兩廣侍郎劉堯誨議照制馭猺獞之法
撫化爲先防禦次之至勤兵剿處則甚非得已之
計也賀縣里松八峒與樊屯勢江等猺獞皆盤據
萬山之中徃歲時肆流劫負不討之罪久矣頃年
以來

聖明馭宇

威德覃敷各猺獞悉皆就撫輸糧願爲編戶其樊屯
勢江俱已建立土司住守迄今地方寧謐惟里松

八峒延袤百里界聯三省兼以奸徒逋逃於中招
主嚇驅於外而里排人等利其田土膏腴往往懷
挾舊讐告兵征剿是以諸夷身雖向化心尚懷疑
臣等節行該道叅政陳應春宣布恩威推誠撫諭
一時境土晏然但夷性叵測奸宄潛滋難保其久
而不變者若不設官管束以察其向背通其情性
禁奸戢暴杜釁防微非所以堅效順之心而杜反
側之漸者也今據該道議呈比照樊屯事體設立
土司就以冠帶名色把總黎邦伯移家住守管束

獍民及於江華隘口立堡把扼臣等叅酌事體委果相應其勢江源均屬要害雖經議設土司控馭諸徭緣出一時權宜之計俱應題

請如蒙伏乞 勅下兵部再加查議行臣等督行道府各官遵照於里松八峒適中處所建立土司行令名色把總黎邦伯管理其編保甲立社學及設堡守把等項悉照該道所議施行其勢江源併准設立土司仍督令舍人劉理照舊用心管束三年之後如果地方安靖夷民帖服各准以副土巡檢

職銜世守其土若失策誤事據法處治另議更委
庶二縣撫夷永爲良民三省鄰界並獲安堵矣

奏報丈量併論薦官員疏

奏爲丈田畝清浮糧以蘇民困事准戶部咨該本
部等衙門會題並參酌科臣郝維喬楊廷相建白
詳加議擬開欵上 請奉

聖旨這清丈田糧事宜旣會議停當著各撫按官悉
心查覈著實奉行毋得苟且了事反致勞擾欽此
并將冊式咨發到臣該臣遵奉

明旨案行該司道嚴督各屬委官悉心清丈其免丈處所如有奸弊一併丈量勒限竣事但粵西民少夷多田瘠俗惰占據拋荒之土村野相望減免停徵之糧州邑幾半兼之界連楚粵地雜民屯或被土州越占或撥土兵耕守或豪右陰收搖統而陽匿公租積蠹隱奸難以縷舉額旣失於侵沒民復愚於丈算州縣官多持異說非怵於猾夷之起釁則阻於豪右之謗言因循觀望已非一日復該臣等督行該司掌印兼理糧儲右布政使吳善等酌

議釐弊便民事宜并製盡田圖算法刊刻成書分發各委官遵守仍宣示

廟堂德意任怨勤民者必從優錄推奸避事者必加顯斥事完造冊呈報覆覈去後今據談司呈稱行准分守桂林道左叅政彭富分守蒼梧道右叅政胡維新左江兵巡帶管分守道副使徐儒分守右江道右叅議彭應時分巡桂林帶管屯田道副使秦寵各將分督所屬州縣衛所丈完官民屯餘田糧文冊到司該本司署印帶管糧儲左叅政彭富

覆加磨算類造間本年三月二十三日奉司右布政使胡定到任准左叅政彭富將清丈事務咨送接管再加查覈明白類造簡明文冊并將各委官分別勤惰等第呈報到臣該臣議照粵西在

國初時疆土式闢稅額充盈自景泰而後徭徭縱橫閭閻凋耗豪強奸巧乘之影射者又多田糧失額盖日甚一日矣屢經奏

請清理竟以阻格難行頃歲

王靈遐震遠邇嚮風遵奉

明旨不惟氓庶輸心諸獠夷靡不俯首聽命至崛起
如馬平三都諸黨稍示懲創旋亦帖然以故版圖
復完稅糧足額復

國家二百年全賦甦邊方千萬民積苦非

聖神威德廣被曷以致此備查

會典開載 國初本省原額官民田地一十萬二千

四百三頃九十畝夏稅秋糧米四十九萬四千二

百二十四石至弘治十五年官民田地一十萬七

千八百四十八頃一畝七分三釐四毫夏稅秋糧

米四十三萬一千三百五十九石三升七合七勺
八抄六撮一圭三粒內節年失額官民地一萬八
千一百四十九頃七十畝零該糧八萬三千九百
一十三石六斗九升零而無徵者尤多除梧州府
先年開設大教場用過官地三頃八十三畝三分
一釐五絲該糧三十四石八斗六升二合八抄近
勘明割屬廣東西寧縣民地一十三頃八十九畝
五分九釐三毫四絲五忽該糧五十九石四斗七
升四合六勺續改撥柳州南丹象州賓州等衛所

作爲屯田該官民地五百八十三頃六十畝三分
六釐六毫四絲八忽糧二千六百一十六石九斗
四升九合三勺四抄今據該司冊開丈過各州縣
實在官民地九萬六千四百六十二頃一十四畝
二分一釐六毫八絲夏稅秋糧米四十五萬八千
九百六十九石五斗六升九合七勺一抄五撮七
圭零是比弘治十五年之額已增二萬七千六百
一十石零比

國初原額尚少三萬五千二百五十四石零又查

會典所載 國初廣西都司各衛所屯地原額五百

一十三頃四十畝原無糧數每畝照例起科一斗

二升該糧六千一百六十石八斗至弘治十五年

以後屯額新舊共四千六百四頃八十二畝九分

六釐九毫九絲三微零正屯餘屯糧三萬九千五

百一十一石四升二勺一抄四撮七圭九粟內節

年失額屯地一千四百九十五頃二十二畝七分

五毫零米一萬四百八十六石七斗一升六合七

勺三抄零而無徵者尤多除柳慶二衛先年撥屬

永順永定土司并給遷江所土百戶折俸贍兵地
三十八頃三十六畝六分四釐糧三百五十八石
一斗五升一合七勺九抄七撮今據該司冊報丈
過各衛所實在正屯餘屯地四千五百六十六頃
四十六畝七分二釐九毫八絲零該糧三萬九千
一百五十二石八斗八升八合四勺一抄零又柳
州南丹二衛象州千戶所續收馬平象州上林三
州縣官民地五百八十三頃六十畝三分六釐六
毫四絲八忽糧二千六百一十六石九斗四升九

合三勺四抄又平復十寨除收回上林縣官民糧
并南丹衛賓州千戶所各舊屯糧外復丈增屯地
三十一頃四十一畝五分五釐七毫該糧一千三
百七十四石九斗三升一合四勺六抄屯餘共糧
四萬三千一百四十四石七斗三升九合二勺一
抄七撮查得前項屯餘糧米先年因賊勢猖獗民
亡戶絕景泰四年 令將遺下田土撥給軍兵戍
守許其開耕作爲屯餘今除正屯糧米六千一百
六十石八斗尚多屯餘糧米三萬六千九百八十

三石九斗五升有零即係

國初民糧之額均屬版圖勢難更變但衛所追徵大半侵沒已該臣督行司道行令備開額徵糧數佃種花名責成附近州縣公同徵收互相稽覈今總合官民并多出屯餘糧米共四十九萬五千九百五十三石五斗一升九合七勺零外又收一項柳州慶遠二衛屯餘地作爲民田三十八頃三十六畝六分四釐該糧三百五十八石一斗五升一合七勺九抄七撮一項

欽賜 靖江王府花地一百一十八頃八十八畝八分九釐九毫該糧一千八百一十一石二斗三升四合六勺四抄通共四十九萬八千一百二十二石九斗六合一勺除已足洪武年間額數外多餘官民地七百六十八頃八十七畝一分二釐零該糧三千八百九十八石九斗六合一勺內臨桂靈川陽朔義寧恭城荔浦昭平七縣計數所餘不多難以攤派姑併入實徵外全州多米二千一百王十六石七斗一合七勺一抄一撮一粒五粟該州

所申官地原每畝二斗五升起科過重將多餘前
米均攤減輕一斗一升七合四勺富川縣近因新
建昭平縣治將二五都糧米割屬昭平徵收而富
川歲費不敷今丈出多餘米二百零九石八升四
合二勺該府江兵巡道議呈該縣賦役本均無用
攤派聽令徵輸以足歲用其岑溪縣多餘米三百
四十三石二斗九升五合八勺五抄一撮一圭又
征平十寨丈增新地該糧一千四石二斗一升一
合八勺七抄皆係

國初以前糧賊占據近因勦撫平寧以致常額稍溢相應照例起科以少濟兵食之需其他各州縣衛所節年隱占失額田糧今俱清復完足其官民等則無用紛更者悉仍其舊額賦役條鞭所當恪守者申飭其將來從茲邊氓得免愁嘆之聲永被均平之化矣額內丈出尚有拋荒開墾官民地二千四百八十頃三十四畝五分八釐零該糧九千五百八十三石八斗一升四合五勺零正屯餘屯地二百二十七頃六十八畝四分二釐零該糧一千

五百四十二石二斗六升二合四勺零內多係右
江所屬地方緣有可耕之地而無可耕之民以故
極目荒蕪凋殘尤甚茲若棄之不治則稅額終虧
如復募徭以耕是益樹賊黨反貽滋蔓之患隨據
柳州府同知漆文昌條議粵西久荒之地有不可
以他省之治治者查其地力最宜種植桐樹一年
成林二年成樹所獲油利不出三年倍於稅畝合
令州縣各堡兵種桐於堡畔遠近荒地則收可贍
兵各村民種桐於村外遠近荒地則收可助賦

等因該臣批行分守右江道右叅議彭應時覆議
本官所陳樹桐之法盡人而可效其能隨地而可
與其事用力旣少成功尤速且水旱不能爲之灾
盜賊不能爲之害本官先任河池以此教民至今
頗有明驗則是法乃其所嘗試者今旣力任其責
必有成效具呈到臣復批行布政司行委本官總
理其事率所屬各州縣責令兵民如法栽種期以
三年得利驗收輸課不惟汙萊可闢而民生亦漸
以充是亦足賦厚民之一策也如本官督率果有

成績另行薦擢以償其勞其餘州縣衛所比照山東丈過荒地事例寬以期限假以便宜行令有司軍衛召人承種照例三年後一體徵輸庶使蓁莽悉除額糧充實又如桂林之永寧永福義寧興安陽朔平樂之永安脩仁荔浦平樂昭平恭城賀縣柳州之懷遠洛容柳城各地方猺獞皆臣先任巡撫時所撫處者其時切於招徠多從寬恤或量入其稅或盡蠲其差或折收禾把依俗隨宜無非所以堅其向化之志其後有司皆非舊人寢失初意

有排年生事而過於誅求有兵堡恃強而恣行凌虐往往激成多事今既履畝定賦若復科率過重恐所不堪如興安融江陸峒諸徭近年認糧一百二十石每石納銀五錢今丈復原額米五百九十石五斗零已加數倍止照各府輕則例每石納銀三錢五分免其雜差其餘新撫諸徭徇臣督行各官俱就中劑量仍加優恤務使糧額不失夷心易從如輕信排年土兵人等分外朘削致生携貳則州縣官之責自有不得而辭也再照清丈之役在

粵西事勢之難視他方尤甚非諸司道督率之嚴
各有司奉行之謹未必遽底成績而一二慢事妨
民者亦有之相應照例論薦以昭激勸除丈量無
過知州知縣等官無容別議及太平府知府王命
爵委官通判王紹武柳州府知府陳大猷改委署
武宣縣事通判宋和慶慶遠府知府高文炳委官
同知陳應魁思恩軍民府知府鄭國臣委官同知
吳譽聞潯州府改委通判李常春鬱林州知州鄧
璿永安州知州岳如厚陸川縣知縣田升平南縣

知縣袁信宜隆安縣知縣張邦燮永福縣知縣莊
自勉武緣縣知縣黃約上林縣知縣李三樂懷遠
縣知縣李惇天河縣知縣丁時楨思恩縣知縣陳
嘉會等或勤勞並著而土屬額糧不多或清理得
宜而田野墾闢有待容臣分別以禮獎勸俱不敢
槩舉外查得廣西布政司管理糧儲道右布政使
今陞江西布政司左布政使吳善旬宣偉望康濟
宏猷警惰勵勤經營皆其首事製弓習算規畫如
在掌中見任管理糧儲道右布政使胡定屏翰方

新經綸素裕甫下車而洞悉均平之要當終事而
彌勤釐正之思分守桂林道左叅政彭富才諳精
練展錯詳明轄二郡而區分悉協軍民綜通省而
憂勤靡間夙夜分守蒼梧道右叅政胡維新風猷
峻振器度恢弘嚴足冒豪右之奸欺明足鑒屬僚
之臧否左江兵巡帶管分守道副使徐儒寬猛兼
施經猷丕著三郡之浮糧盡洗一方之積困頓甦
分守右江道右叅議彭應時沉毅有謀春容不迫
軫民艱恫瘝在念防夷患劑量苦心分巡桂林帶

管屯田道副使秦寵外崇敦確中蘊精明撫夷而
控馭得宜清屯而稽覈有法又桂林府知府傅時
望政持簡重志切澄清按圖籍民絕弊端定章程
官知法守委官通判李佳徵任事最恪持法更堅
議處鑿然有條民屯咸資底績全州委官本府通
判樊芝雅志爲民實心任事清覈而地無遺利劑
量而人無間言陽朔縣委官本府推官李道先署
篆才周世務履畝念切民瘼弊絕賦清威行惠洽
永寧州知州尹廷俊當三鎮之獷悍控禦不失機

宜處各里之凋殘清理率多惠政臨桂縣知縣邵
以仁溫文濟以嚴毅煩劇應以從容積蠹一清增
賦萬計靈川縣知縣陳一洙才揮霍而劑以勤法
公平而行之恕成功稱最譽望益隆灌陽縣改委
鬱林州判官常正和隱糧之查正具竭心思豪右
之不徇益占風采平樂府知府周祈誠與才合威
以信行民徃之利弊周知賦役之均平利賴委官
通判朱應辰敏于趨事出入戴星不辭約于奉身
往來裹糧自給昭平縣知縣方思賢志向素銳幹

濟克勤不避瘴雨蠻烟洞悉夷情民瘼富川縣知
縣周篤棐閭閻念切單騎惟恐擾民隴畝躬清按
籍不遺餘力荔浦縣知縣呂文峯謹飭之心敏達
之識諸徭撫綏不怠二邑經理咸宜梧州府知府
陸萬垓身率屬僚勞瘁寧忘于阡陌化孚徭徭畏
懷何異于閭閻改委同知魏仕賢督屬邑完報如
期勞徵夙夜覆岑溪奸欺盡究弊絕里胥容縣知
縣伍可受明如燭照才若刃游弊剔而吏服難欺
賦增而民稱不擾蒼梧縣知縣龐一夔賦本縮于

徭峒而深究弊源地久没于別疆而力還故物藤
縣知縣陳雅言秉心慎密從事勤渠履畝先辨軍
民用法必懲欺玩博白縣知縣高承謙地界粵省
東西稽度不容影射糧覈民狼虛實計算必合版
章潯州府知府江萬仞才猷百練政令一新三邑
之額稅盡充萬姓之懽心允洽貴縣知縣譚耀履
畝能勤懲奸不避百姓包賠悉去一郡完報居先
桂平縣知縣孫世禎田多溪澗沿履不憚辛勞躬
親較量抱病尤勤綜理南寧府知府陳紀法行不

撓令布有條闔屬賴指示之規羣奸絕欺隱之弊
委官通判江龍涉歷州邑之野力任怨勞處分軍
民之糧曲中肯綮橫州知州丘鍾恩素洽於編氓
政不私于豪室殫心剔蠹力疾奉公新寧州知州
陳躍潛攜圖驗畝四野之踏丈必親益寡裒多三
里之虛浮悉豁宣化縣知縣陳志願勛勞匪懈請
託不行豪右服其公平困窮頌其惠愛柳州府委
官同知漆文昌與勞討寇致綜核之稍稽力任墾
荒終疆理之攸賴賓州知州饒敬承志在蘇民身

親履畝區別精而稅定防閒謹而令行來賓縣知
縣潘思誠足跡遍歷乎窮荒艱危弗避額糧能充
乎舊數勞勩居多遷江縣接管知縣劉鳳儀當履
任之始而銳志作爲持均田之公而殫心清復以
上諸臣皆勤勞顯著所當荐揚以備錄用者也又
查得岑溪縣知縣何性資近鈍耳目寄于匪
人防檢多踈權柄移于下吏鄧元積書也假以編
號發弓而任其詐鴈鄧世高老人也指以稟官免
丈而恣其誅求怒人戶之訐辯鞭箠致斃憤委官

之查覈愎戾懷私此一臣者糧雖充額政多病民但其年力尚強操持未壞所當改調間散以全器使者也柳城縣知縣黃始以清查而稍罹怨議繼焉畏縮而一意推延口稱患病公移之催督置若罔聞計在脫身私用之弓步匿不以報雖因駁查而增額未免隱蔽而容奸此一臣者本當併議改調但該縣田土皆係馬平寄莊清丈雖已報完士民間未面證姑留在任責與委官同知漆文昌覆加查對用服衆心本官相應降俸以示懲戒者

也馬平縣知縣勞

政寬而豪強易撓性緩而

法令不行報糧額先後懸殊旣乏精詳之慮舉文
量勞怨未任難辭怠弛之愆宜山縣知縣冉任
事弗虔當勘報而漏開田數五十頃彌奸無術致
欺蔽而捏稱免徵二百石旋經查明難掩疎縱融
縣接管知縣鍾任雖尚淺識本迂惟欲執實
徵以順人情不思復常賦以蘇貧困羅城縣知縣
劉完報稍早奉行未見真心荒占甚多姑息
尚仍舊習以上四臣俱應分別罰俸以示怠事之

警者也內馬平融縣羅城及象州洛容五州縣亦與柳城事體相同併責同知漆文昌督同查對以便徵輸俱候魚鱗冊造繳布政司覆覈無異據實申報中間如有縱弊徇情虛文塞責者容臣等仍行叅論降斥庶田賦永清吏治益奮矣伏乞

勅下戶部再加覆議如果臣所言不謬將吳善等移咨吏部循資擢用何 改調閒散黃 量加降

俸勞

等量加罰治其申飭事宜通行各司道

督行所屬府州縣衛所永爲遵守施行 卷五終